

Ministro Beke ta e pesadiya pa coleganan ministro:

Lili Beke ta logra e prome Hotel luho pa San Nicolas

ORANJESTAD (AAN): Tin docter cu ta alivia dolor den hospital y tin docter cu ta alivia dolor na consultorio, na cas, riba caya, den parlamento (ora cu coleganan cay flauw) y tambe tin docter cu ta alivia dolor economico pa mitar di Aruba, esta Pariba di Brug y tur esaki cu un solo recept: "traha pa pueblo".

Esaki ta loke ministro Beke ta haciendo pasobra apenas algun luna den e gubernacion nobo den e funcion nobo di ministro di Asuntonan Economico y tambe Turismo, e ministro aki manera cu DIARIO a anuncia siman pasa caba, ta bin cu un proyecto grandi pa Aruba y e

proyecto aki tambe lo bay crea envidia grandi cerca "colega" ministronan.

Plan Sasaki cu AVP a campana na grandi cune pa añanan largo a produci pa e pueblo Pariba di Brug nada mas cu e prome rotonde vierkant na mundo, un borchu cu Plan Sasaki riba dje y un caminda principal cu obstaculonan riba dje pa por yega San Nicolas.

San Nicolas no por a haya su hospital pasobra envidia politico a pone tur cos tranca, Sportpark na San Nicolas tambe a ser tranca, Lotto pa Deporte tabata tin tur plan cla pa tuma over cierto in-

stalacionnan deportivo den Colony y te awe tur cos a worde tranca pa motibo di envidia politico.

Pa basta tempo hopi hende specialmente den sector turistico tabata keha cu ministro Beke ta keto y cu nan no ta tende nada di dje.

Sector turistico a ser hereda door di ministro Beke cu hala di problema serio: Radisson, casinonan cu problema, ATA sin placa etc etc y pueblo tabata kere cu Beke por a haci magia den un o dos luna.

Mientras cu otro nan tabata gaba cu proyectonan fofu, Beke tabata trahando duro pa bin cu e proyecto nobo grandi pa San Nicolas sin cu mester bluf cu Sasakiplan cu riba papel a costa pueblo miyones y te awe no a duna resultado.

San Nicolas ta bay haya un hotel luho y berdadero y tur esaki den man di yunan di tera cu lo tin mayoria di e accionnan den e proyecto nobo aki pa Pariba di Brug.

E noticia di e hotel nobo pa San Nicolas lo cay awe

manera un bom pa tur contrincante politico cu a haci nada otro cu trata di tranca trabao di ministro Beke pa e ultimo añanan di gubernacion.

For di ministerio di Ministro Beke, DIARIO a haya un comunicado oficial cu ta bisa lo siguiente: "Contribuyendo na e desaroyo Economico di Aruba y muy specialmente desaroyo di San Nicolas, Ministro actual di Economia Turismo, Asuntonan Social y Cultural cu hopi alegria ta anuncia cu gobierno diabierna ultimo den Consejo di Ministro a ratifica y duna aprobacion y tur sosten na e proyecto di Brown Investment II, di Bufete di abogado Brown.

Bufete di abogado Brown cu ta inversionistanan local (Arubiano) y ademas naci na San Nicolas ta dispuesto pa inverti alrededor di 54 miyon Florin pa un hotel luho di 250 camber estilo Suite, cu piscina, cancha di tennis, dos restaurant, shopping arcade,

casino y sala di conferencia pa maximal 500 persona y eventualmente e Golf Course di San Nicolas tambe por ser liga cu e proyecto aki.

E hotel aki lo worde construi caminda actualmente ta situa Esso Club den Colony, Brown Investment II lo tin mayoria di accion y e resto lo ta den man di otro inversionistanan.

Cu e expansion grandi di Coastal y desaroyo di e proyecto di e hotel aki pa San Nicolas e construccion di e Hospital di San Nicolas difinitivamente ta bira indispensable.

Tambe por menciona cu tin diferente otro proyecto sumamente positivo pa e desaroyo di San Nicolas cu pronto lo worde anuncia.

E hotel aki lo bay carga e number di "Sunny Beach Resort and Casino".

Ministro Beke ta felicita pueblo di San Nicolas en particular y Aruba en general cu e bon noticia aki nos ta habri un bon aña nobo".

Reunionan di Tri-Partite ta cuminza awe na Antiyas

ORANJESTAD (AAN) Ayera parlamentarionan di Aruba a viaha pa Antiyas caminda nan lo bay participa durante e siman aki den reunionnan di Tri Partite; entre Antiyas, Aruba y Hulanda.

Parlamentarionan di parlamento di Hulanda lo bin Antiyas pa reuni cu coleganan di Aruba y Antiyas den cuadro di reunionnan di Tri Partite pa asina discuti diferente punto di acuerdonan den Reino.

Segun informacionnan cu DIARIO a haya, cos no ta pinta dje bon ey pa Aruba y na mesa di negociacion solamente ta cu hopi union, Aruba lo por logra di scapa curpa pa loke Hulanda tin tras di cortina pa enfrente pais Aruba cune.

Mal maneho y entrega casi total di loke ta representa pais Aruba durante ultimo añanan di gubernacion a pone cu e posicion di pais Aruba no ta nada fuerte y esaki parlamentarionan di OLA, MEP y AVP lo bay nota tambe na mesa di reunion di Tri Partite.

Ta di spera cu e deparamentonan di informacion di gobierno (ta boshi tin) por tene pueblo tur dia na altura di loke ta worde discuti na Antiyas durante e reunionnan importante aki y no ora cu cos a pasa caba, pueblo despues di algun siman ta bay tende loke cierto parlamentarionan ta cumbina pa laga pueblo sa. Pueblo tin derecho pa haya

sa tur dia loke ta pasando y tambe haya e derecho pa por reacciona na tempo.

DAK DI CALIDAD!!



7/10/99
lt